

2 kementerian mohon kakitangan tambahan

Langkah bantu kawal penularan wabak, lancarkan program vaksinasi

Oleh Ilah Hafiz Aziz
illahhafiz.abdulaziz@bh.com.my

Kuala Lumpur: Sekurang-kurangnya dua kementerian sudah menghantar permohonan kepada Jabatan Perkhidmatan Awam (JPA) bagi mendapatkan khidmat sokongan penjawat awam daripada kementerian lain atau menerusi agensi dalam kementerian sama.

Khidmat sokongan itu bagi membantu mengawal penularan wabak COVID-19 serta melancarkan program vaksinasi COVID-19 kebangsaan yang akan bermula awal Mac ini.

Kementerian Sains, Teknologi dan Inovasi (MOSTI) memerlukan bantuan sekurang-kurangnya 10,000 penjawat awam daripada kementerian lain, manakala Kementerian Dalam Negeri (KDN) pula memaklumkan mahu menggunakan khidmat Jabatan Sukarelawan Malaysia (RELA) bagi membantu Jabatan Penjara.

Ketua Pengarah Perkhidmatan Awam, Datuk Mohd Khairul Adib Rahman ketika dihubungi *BH*, mengesahkan MOSTI antara kementerian terawal menghantar permohonan kepada JPA bagi tujuan berkenaan.

Katanya, mobilisasi penjawat awam antara jabatan adalah untuk menjayakan program vaksinasi

COVID-19, tetapi tidak membabitkan sebarang perjawatan baharu.

“Apabila pelan vaksinasi berjalan di seluruh negara, perlu ada lebih banyak bantuan seperti mereka yang bertugas sebagai kerani untuk menjalankan kerja merekod. Ia hanya kerja sementara.

“KDN pula sudah menyatakan untuk menggunakan khidmat RELA bagi membantu Jabatan Penjara,” katanya menambah, setakat ini JPA belum tahu jumlah keseluruhan penjawat awam yang diperlukan atau ditukarkan bagi membantu agensi lain.

Mohd Khairul Adib berkata, semua pihak dalam sektor awam perlu bersedia dan tidak boleh menunggu sahaja dalam tempoh darurat ketika ini.

Katanya, setiap kementerian akan diminta menyediakan pembentangan penugasan sementara pegawai perkhidmatan awam Persekutuan ke agensi lain dalam tempoh Proklamasi Darurat 2021, dalam masa terdekat.

Beliau berkata, Ketua Setiausaha (KSU) setiap kementerian sudah diarah membentangkan jumlah kakitangan dan perkara berkaitan dalam urusan itu, termasuk spesifikasi jabatan yang diperlukan.

Difahamkan, JPA juga sudah mengeluarkan pekeliling bagi menyelaras urusan penempatan pegawai bagi tujuan penugasan semula secara sementara ke agensi perkhidmatan perlu dalam tempoh Proklamasi Darurat 2021.

Ia membabitkan kumpulan perkhidmatan pelaksana serta penguurusan dan profesional.

Isnin lalu, Ketua Setiausaha Negara, Tan Sri Mohd Zuki Ali dilaporkan berkata, kerajaan bersetuju

melaksanakan mobilisasi sumber perkhidmatan awam Persekutuan dan negeri bagi membantu agensi yang memerlukan perkhidmatan mendesak untuk mengawal penularan COVID-19.

Katanya lagi, langkah itu termasuk penajajaran sementara kakitangan awam ke tempat yang memerlukan perkhidmatan tambahan, terutama bagi perkhidmatan sokongan kesihatan dan keselamatan.

Bangunan dan fasiliti kerajaan bersesuaian juga akan dikenal pasti di seluruh negara bagi tujuan dijadikan pusat pengambilan ujian calitan.

JPA bertanggungjawab menyelaras perkara itu bersama Kementerian Kesihatan (KKM) dan kementerian, jabatan serta agensi lain yang terbabit.

Tindakan itu diputuskan Jawatankuasa Teknikal Pengurusan Darurat yang sudah bersidang sebanyak empat kali bagi memantau isu berkaitan pelaksanaan dan pengurusan darurat.

Rabu lalu, Menteri Sains, Teknologi dan Inovasi, Khairy Jamaluddin, dipetik berkata, kerajaan menasarkankan 75,000 orang akan menerima suntikan vaksin dalam tempoh sehari program vaksinasi COVID-19 kebangsaan bermula di 600 pusat vaksinasi seluruh negara, mulai Mac.

Katanya lagi, 75,000 suntikan sehari adalah sasaran awal kerajaan dan sasaran seterusnya bergantung kepada bekalan supaya 150,000 suntikan sehari boleh dilaksanakan meliputi dos kedua, vaksinasi terhadap 27 juta orang atau 80 peratus populasi negara ini dapat diselesaikan pada Mac tahun depan atau paling cepat hujung tahun ini.